

Date – 22/03/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizoram Lok Sabha inthlan lo awm tur atana inbuatsaihna ngawrh taka kalpui a ni.**
- 2. Mizoram Pradesh Congress Committee chuan kumin Lok Sabha inthlanpui a an party candidate turin MPS (retd) Pu Lalbiakzama an an dah.**
- 3. Election Commission chuan ningani khan Electoral bonds data set chu mipui hmuh theih turin a ti chhuak.**

<><><>

EVM/VVPAT

Kumina Lok Sabha inthlanpui lo awm tura inpuahchahna kal mekah inthlan nana hman tur EVM leh VVPAT chu nimin khan District hrang hrangah Randomisation vawi khatna neih a ni.

Aizawl ah chuan DC Conference Hall ah DC Nazuk Kumar hoa neih a ni a, Inthlanna felfai tak a awm theih nan EVM randomization hi neih thin a ni a. EVM te chu khawi constituency leh khawi polling station ah nge dah an nih dawn tih tu mahin an hre lawk lo a. Computer kaltlangin serial number hmangin, EVM khawlte hi khawia hman tur nge tih thlan thin a ni.

Lunglei ah chuan District Election Officer leh bawrhsap nibawk Pi Ramdinliani chuan a hman pui a, Lunglei district chhungah hian Pink Polling station 24 tiamin Polling Station 176 a awm, Assembly bial 6 a awm bawk.

Champhai ah chuan NIC Conference Hall, Keifangtlang, Champhaiah neih a ni a, First Randomization-ah hian Champhai District-a Parliamentary Segment pathuma EVM leh VVPAT hman turte chu Computer hmanga thlan chhuaha semrual a ni.

Serchhipah chuan District Election Office ah Inthlanpui lo awm tur atan Electronic Voting Machine Randomization chu Addl.DC Pu James Lalnithanga hova neih a ni a, EVM Randomization thawhkhatna ah hian election official dang te bakah Political Party hrang hrang aiawhte leh chanchinbumite an tel a ni.

Lawngtlai ah chuan NIC Conference Room-ah District Election Officer Pu Cheemala Siva Gopal Reddy hovin neih a ni a, Lawngtlai District chhunga polling station 181-a inthlan buaipui tur, Presiding Officer, Assistant Presiding Officer leh Polling Officer turte chu thlavenga awm tur chhut telin khawl hmanga thliar fel niin, an kalna tur assembly constituency tih fel nghal a ni a.

Team inkawp tur leh an kalna tur polling station te chu 2nd leh 3rd randomisation-ah khawl hmang veka tih fel leh a ni ang.

Mamit ah chuan DC Pu V.L. Remliana hoa hman niin DC chuan ECI ruahmanna leh duhdan chu a rintlakin a felfai thu a sawi a, EVM khawl hman turte hi a hman tlak leh tlak loh endik leh vek a ni ang a, khawl hmanga thliarfelna 2nd Randomization hi neih leh tur niin, mahni duh anga siksawi leh khawih chingpen theih a nih loh thu a sawi.

<><><>

MPCC LS CANDIDATE

Mizoram Pradesh Congress Committee chuan kumin Lok Sabha inthlanpui lo awm turah an party candidate turin MPS (retd) Pu Lalbiakzama an an dah.

MPCC President Pu Lalthanzara chuan nimin khan an candidate tur hi puangin MNF nena Common candidate nei tura inbiakna a awm tawh a ti a, an neih leh loh chhan chu BJP bei tur ber an nih avang leh MNF in NEDA an thawhpaina an tih tawp theih loh vang anih thu a sawi.

Congress Candidate tur Pu Lalbiakzama hi an chhungkuain Aizawl Model veng -ah an cheng mek a, Kum 2012 June thlaah Home Department-ah Joint Secretary a post a ni a, Home Department-ah hian a pension thleng awmin Secretary thlenga kaisangin Mizoram Police Service atanga Home Secretary ni hmasa ber a ni.

Home Department-a a thawh chhung hian Mizoram Sorkar leh Tripura sorkar aiawhte nen Bru chungchanga inbiakna ah vawi eng emawzah Mizoram ai a awh a, Mizoram sorkar leh HPC 'D' te remna zawnga inbiaknaah Mizoram aiawh Team Leader niin hlawhtling takin inremna an ziahpui thei a, he mi zarah hian Sinlung Hills Council a piang a ni.

Lok Sabha inthlan lo awm turah hian Party thenkhat ten candidate puang tawhin Mizorama rorel lai ZPM chuan Richie Vanlalmangaiha an ruat a, PC Party in Rita Malsawmi ruatin Pu Lalhriatrenga Chhange chu independent in a chuh dawn a, vawiin hian MNF Party in an candidate tur an puang dawn a, BJP erawh central lamin an puang dawn niin state-a an thuneituten an sawi.

<><><>

PANGOLIN SCALES

Vairengte Forest Range Staff leh Excise & Narcotics tangkawp ten tun thla ni 5-a Saphu kawr Kgs98 vel an man chhuizuina kal zelah mi pahnih an man.

Forest Department chuan Lalzuithangi (kum 41) Champhai leh Vanlalzawni (kum 42) Zemabawk, Aizawl te chu manin, District Jail-ah dah luh an ni a; an mi man zinga Lalzuithangi hi Wildlife Crime Control Bureau te pawhin hun engemaw chen atanga an lo chhui tawh a ni.

Pi Margaret Lalramchhani, Divisional Forest Officer, Kolasib-in a thuchhuah siama a tarlan dan chuan, tun thla ni 5 zing dar 4:40 vela Vairengte

Forest Range Staff leh Excise & Narcotics tangkawp ten Saphu kawr hi phailam atanga an rawn phur chhoh chu an man a; lirthei khalhtu Laldaniela Shillong mi ni a inchhal an man a, lirtheiah hian amah chauh a chuang a ni.

Hemi thubuai chhui zuina kal zelah hian hetiang lam sumdawnna lama a zawmpui te chhui chhonzawm nghal a ni a, inhnamhnawih ngei nia hriat mi pahnih, Lalzuithangi Champhai leh Vanlalzawni Zemabawk, Aizawl te chu man an ni a; Aizawl lam atang in mi pakhat, Laltanpuia, Bethlehem Vengthlang, Aizawla khawsa mek chu man a ni bawk.

Tarlan tawh angin Saphu kawr hi Vairengte Excise Check gate-ah Shillong leh Aizawl inkar Maxicab service atanga man a ni a; Maxicab khalhtu hian Counter nghaktuten 'Vawksa rep' ti a an sawi thu leh Counter-a dah tura an tih anga phur mai a nih thu alo sawi tawh a ni.

<><><>

INDIGENEOUS GAMES

Saitual District huam chhunga Branch YMA te tana buatsaih, Mizo infiamna (Mizo Indigenous Games) hmanga intihsiakna chu vawiin hian chhonzawm a ni ang.

DDK Aizawl leh Mizoram Indigenous Games Association (MIGA) buatsaih, Mizo infiamna (Mizo Indigenous Games) hmanga intihsiakna hi ni 2 awn tur a ni a, Intihsiakna hmun tura ruahman hmasak Saitual Public Playground chu nimin khan khaw awm danin a zir loh avangin Saitual Auditorium ah chawpchilh taka insawn a ni.

Mizoram Indigenous Games Association President Pu MS Dawngkima chuan thu sawiin, chhak, thlang, chhim leh hmar ramri depa ramri venhim ÷ul an tih angin pi leh pute atanga rochun infiamna te chu humhim a, chhawm nun zel a pawimawh a ni, a ti a, hnamdang infiamna entawn ringawta hun hmang ral te chu hnam ding chhuak an ni ngai lo tih sawiin YMA te pawhin hnam infiamna chu sum tamtak sen ve ngai lo awlsam taka tih mai theih a ni a, chawinung a, humhalh thar zel tura sawmin, "DDK leh MIGA ten intihsiakna hun remchang an siam chu lawmawm atih thu a sawi.

District huap intihsiaknaah hian YMA Branch 10 atangin infiammi 180 vel an tel thei a, intihsiakna chi 5, Mizo inbuan, Inarpathai, Insuknawr, Insaihrupawh leh Inkawibah hmangin intihsiakna hi neih tur niin, vawiin hian zawh hman tum a ni a, intihsiakna tina a tiþha pakhatna atanga pathumnate chu District aiawhin State level intihsiaknaah an tel leh ang.

<><><>

HEALTH MINISTER

Chennai-a a thlawna Lung lam thalo zai ngai zai zingah mi 18 hlawhtling taka zai an ni.

Health Minister, Pi Lalrinpuui hmalaknaa, Lung lam thalo zai ngai, Chennai-a Sri Ramachandra Medical Center, a thlawna zai tur ruahmanna siamah, Batch hmasa ber ah mi 19 kaltir an ni a, an zinga 18 chu hlawhtling takin zai an ni tawh a, 1 chu zai hmaa inenkawl la ngai phawt a ni.

Kumin February-a Cardiac Camp ZMC a buatsaih atangin Lung zai ngai te hi hmuhchhuah a ni a, Chennai ah a thlawna enkawlina an dawn hnuah thenkhat an lo haw tawh a ni.

<><><>

DGP VISIT KOLASIB

Director General of Police (DGP) Pu Anil Shukla chuan nimin khan Kolasib tlawh in, SP office Conference Hall-ah Kolasib District chhunga Police te a kawm.

Pu Anil Shukla hian Mizorama DGP hna a chelh hnuah Kolasib SP office leh Police hmun a tlawh vawi khatna a nih thu a sawi a. Kolasib District chu Mizoram mipui nitin mamawh lakluhna kawngpui in a paltlang anih avangin a pawimawh thu a sawi. Bungrua chi hrang hrang a luh rualin Zu, Ruihhlo leh thil dang thalo pawh a luh tel avangin Police te thawhrim a ngaih bik thu a sawi.

DGP chuan, Mizoram chu Zu khapna State a nih avangin Zu leh ruihhlo leh thil dang thalo a luh loh nan uluk leh zual a Duty a tul thu a sawi a, Police Duty zingah dan pel a che an awm thu Complaint an dawng thin chu pawl a tih thu sawi in, tun hnaia Vairengte Police Checkgate a thil thleng chu in siam that nan hmangin, dan bawhchhe nawn tawhlo turin a chah a, a thawhpui Police te chungah Action lak hrehawm a tih thu leh hrem ngaia awmlo turin Police kalkhawmte chu a chah ani.

DGP chuan, Kawngpuia tlan thin lirthei enkawltute hnen atangin Police nilo; pawl thenkhat ten sum leh thil dang an khawn thin ni a sawi awm chu tireh turin SP in thuchhuah siam a tul thu a sawi a. Assam leh State dang Registration nei Lirthei; a bik in Car vei vak tam lutuk chu vei-awm a tih thu leh heng lirtheite hian Zu leh Ruihhlo leh thil dang an phur em tih Dan bawhchhe silova check thin turin DGP chuan Police te a chah bawk.

He hunah hian Kolasib SP Pu David H. Lalthangliana, chuan Kolasib District chhunga Police Station hrang hrang leh DEF dinhmun a sawifiah a. Kolasib District Police in chak zawka hna an thawh theihna tura an mamawh hrang hrangte DGP hnenah hian a thlen nghal a, SP hi Addl SP Pu C. Lalsawta leh Officer leh thawktu dangten an tawiawm.

DGP hova SP Conference Hall-a an inkawm zawh hian DGP chuan SP office chamber ah Kolasib District MJA hruaitute kawm in, MJA hruaitute hian Kolasib District chhunga Police indaih lohna leh Police chetvelna atana Lirthei an indaih loh thu an thlen a. DGP chuan, Mizoram ah hun rei tak Police lakbelh anih tawh loh thu sawiin, Pension a chhuak an awm reng bakah a then an thih avangin Police indaih lohna chu a nasat telh telh thu a sawi.

<><><>

ELECTION COMMISSION

Election Commission chuan ningani khan Electoral bonds data set (an number telin), sumdawng te leh political party-te pui thei tur buatsaih chu mipui hmuh theih turin a ti chhuak.

Donors leh dawngtu list hrang hrang hi Poll body chuan Supreme Court thupek anga State Bank of India-in chipchiar zawka a thehluh hnuah an website-ah a tichhuak a ni.

Bond hi March 2018-a tihchhuah hmasak ber a ni a, thla hmasaa top court-in he scheme hi rin tlakloha a puan hma kha chu SBI in a hralh chhuak a ni. Election Commission chuan electoral bonds chungchanga data chu SBI hnen aṅanga an dawn angin an website-ah “as is where is basis”-in an upload tih a sawi.

